

dites quatre fois lan, ou que li noefyme lez requerroit de venir en leu souffixant, il doivent venir. (20) Et si li uns des noef defailloit ou fust dehaities, par cey il ne peust venir deleis lez autres, cilz des signeurs ou des bonnes villes, qui le dit defaillant averoient mis, doveroient et seroient tenu de metre et anvoier une autre honorable persone avec lez autres an lieu de celui, qui deffauroit; li queilz doit seoir, jugier et jureir enci com cilz, qui devant lui avoit jureit, et ceu quil jugeroit, doit estre de valleur, et quant cilz, qui averait deffaillit, serai repassei, il revainrait auz journeies enci com devant, et li atres<sup>a</sup> serait quites de son sairement, quil averait fait. (21) Et se aucuns durant cez trues ou aipres vouloient guerroier ou faire damaige az signors, az bonnes villes ou a autres de cez communes trues, az noef ou a aucuns deaulz, ou auz messaiges, que li signours ou lez bonnes villes ou autres envoieroient auz noef devant dis, fut pour cauze de jugement, quil averoient dit contre eaulz, ou pour requeste, que li messaiges averoient fait devant lez noef dessus dis, ou pour ceu que aucuns averoient meffait a autres ou aidier a aibaitre lor maisons por le fait dez dites communes trues: a toz ceaulz, que on vouroit par teil maniere damaigier, doit om estre aidans par sairement, tant com ces communes trues duerront et aipres a tous jours maix jusques ai tant, quil an soient deschergies sens mal anging. (22) Nulz ne doit dedens le pourpris de ces communes trues faire monoie, maiques li signeurs, qui lai doivent faire de droit, et li citei de Mes. Et se aucuns autres lez faisoient on contrefaioient, il en seroient jugies com faulz monoiers. (23) Et se aucuns de ces communes trues est requis de traire az champs ou de venir a siege devant forteresses, il doit ad ce venir et servir par son sairement selonc son estait et son pooir celonc ceu, que li noef ou li plus grant partie deaulz vairont, quil y aferrait et que li cais le desirrait. (24) Et se aucuns se plaindoient de aucunz des noef, ou aucuns des noef se plaindoient dautres, li sires ou les bonnes villes, qui ceaulz y averoient mis, seroient tenus destaublir et anvoier autres, jusques a tant que celles cauzes eurent pris fin, et il celles cauzes mises a fin, il revainroient an lour estais. (25) Et se pour raixon de ces communes trues il covenoit tenir sieges devant forteralles, toutes les coustanges, cons y averoit por minours, pour engingz, por ouriers et toutes autres coustanges et necessiteit, que a ce

---

a) So Or.